

28 DEC 2001

MBM-Media

MBM CADANG MAJLIS PERUNDINGAN MEDIA MASSA K'SAAN DITUBUHKAN

KUALA LUMPUR, 28 Dis (Bernama) -- Majlis Belia Malaysia (MBM) hari ini mencadangkan supaya Majlis Perundingan Media Massa Kebangsaan diwujudkan bagi membolehkan input diberi kepada media massa mengenai aspirasi nasional.

Naib Presiden MBM Norizan Sharif berkata majlis itu boleh dianggotai wakil media massa, Institut Akhbar Malaysia dan organisasi yang mewakili pengamal media dan pertubuhan-pertubuhan bukan kerajaan (NGO).

Ia juga boleh dianggotai oleh pemimpin masyarakat, parti-parti politik, wakil institusi pengajian tinggi dan wakil kementerian dan jabatan kerajaan, katanya dalam satu kenyataan hari ini.

Katanya MBM mencadangkan majlis itu dipengerusikan oleh Perdana Menteri atau Timbalan Perdana Menteri dan diletakkan setaraf dengan Majlis Tindakan Ekonomi Negara (MTEN) bagi membolehkannya memainkan peranan dengan berkesan.

Kedudukan itu perlu selaras dengan peranan utama yang dimainkan oleh media masa dalam proses pembangunan negara, katanya.

Majlis itu diharap dapat bertanggungjawab dalam membentuk agenda nasional untuk media massa, menjadi pemerhati kepada media massa dan mengukuhkan bidang kewartawanan melalui perkongsian keprihatinan, maklumat dan kepakaran antara pelbagai organisasi media massa yang menganggotai majlis itu.

Norizan berkata MBM berpendapat majlis itu perlu diwujudkan memandangkan perkembangan baru yang membabitkan media massa sejak kebelakangan ini.

Beliau mengimbas insiden radio swasta ERA yang menyiarkan berita kemangkatan Yang di-Pertuan Agong, Time Highway Radio (THR) yang menyiarkan rancangan berunsur lucah dan terbaru, akhbar The Sun dengan berita ancaman keselamatan terhadap Perdana Menteri Datuk Seri Dr Mahathir Mohamad dan Timbalan Perdana Menteri Datuk Seri Abdullah Ahmad Badawi.

Norizan berkata walaupun pengawasan media terletak ditangan kerajaan seperti Kementerian Penerangan, Kementerian Dalam Negeri dan Kementerian Tenaga, Telekomunikasi dan Multimedia, namun peranan mereka itu terbatas dan tertumpu kepada penguatkuasaan peraturan semata-mata.

-- BERNAMA

NZ HS LAT